

VIRGINAL

59

- her Bibunc nam die widervart  
mit snellelichem kêre.  
tac unde naht er vür sich reit:  
5 sin ros den kumber drumbe leit.  
durch vrouwen und durch mære  
er dô willeclichen pflac:  
sin lop daz wart gedriet.  
sin ros von wîzem schûme lac  
10 reht als ez wære gesniet:  
der sweiz ze beiden siten ran.  
der helt mit lûter stimme rief  
‘nu wol dan, vrouwen unde man!’  
312 Ir vrouwen unde megetin,  
entsliezent ûf der sælden schrin:  
die iuwer herze triutet,  
der ir lange hânt begert,  
5 der sülnt ir schiere sin gewert.  
biz daz man vesper liutet,  
sô sint die zwêne vürsten hie  
mit rehter samenunge,  
der herze tugende nie verlie  
10 von Kindes jugende ursprunge.  
und hatent ir Solmônes kunst,  
ir möhtent in vergelten niht  
ir triuwe, ir dienest und ir gunst.’  
313 Dô brach ûf allez daz dâ was.  
diu künegin ûz den megeden las  
zwelf juncvrouwen adelriche:  
die wâren hôher vürsten kint,  
5 an diu diu lant gevallen sint.  
in was dâ niht geliche  
ân schœne noch an werdekeit.  
ân allen wandel schœne  
ûf ir houbet was geleit  
10 vil schapel unde krône.  
die riten mit der künegin vri:
- dâ nâch zogete der vrouwen schar,  
unz si der banier sâhen dri.  
314 Die gâben gegen der sunnen glast.  
her Dietrich wolt der êrste gast  
der künegin sin gewesen,  
dar umbe er ze vorderst reit:  
5 durch jugent und durch degenheit  
und daz er was genesen.  
sô hâte er vrôuden richen muot,  
in herzen mannes orden.  
schœne vrowen und megde guot  
10 begunden ûf in horden  
vil êren unde sælekeit:  
iedoeh trouc in sin tumber muot,  
daz er unrehte strâze reit.  
315 Des weges in nieman beschiet,  
durch den walt daz er geriet  
bi eime wazzer lûter:  
daz gie durch manegen tiefen grunt.  
5 deme volgt er nâch dô ze stunt  
gên einer burc, hiez Mûter.  
er wând, si hört die vrouwen an,  
und si dâ alle vinden  
und bi in kurzwile hân:  
10 dô muoste im gar geswinden  
diu vrôude in dem herzen sin.  
im begegente ein rise unmâzen lanc  
mit einer stangen stehelin.  
95 316 Der was geheizen Wicram. 96  
er sweic biz er an in kam,  
und sach in an mit zorne.  
dô gruozte in her Dieterich.  
5 er bat im sagen vlizeclich  
der junge hôchgeborne,  
daz er ime tæte kunt  
wie wær diu burc genennet:

311,8 gedriet von *anderer hand*; davor *ausgestrichen* gedieret 10 gesniget von *anderer hand*; davor *ausgestrichen* f 312,8 rechte H 10 entsprungen, uersprunge (*aber ohne jugende*) w 499 313,8 schône] mele, an allez wandel schone w 500 10 vil kronen und schapelle h, manch kospelriche krone w 500 314,12 trog w 501, truog 315,7 wone, wonte H 8 alle do 316,6 junge] tugent

